

O le Tulaga Manuia ma le Fiafia o i Latou o E e Tausi i Poloaiga

Gaoioiga A: “Mafaufau i le tulaga manuia ma le fiafia o i latou o e e tausi i poloaiga a le Atua. . . E faamanuiaina i latou i mea uma, i le faaletino ma le faaleagaga.”

Vaai i le lisi o faamanuiaga na e fatuina i le amataga o lenei lesone. Faaopoopo soo se faamanuiaga faaopoopo atonu e oo mai i le mafaufau. Vase lalo o faamanuiaga e sili atu ona faaletino ma lio faamanuiaga e sili atu ona faaleagaga. Atonu e te iloaina e fetau nisi i vaega uma e lua.

- O le a se faamaoniga o e vaaia i lou olaga e moni ai lenei faamatalaga mai le Mosaea 2:41 ?
- Faitau le Mataupu Faavae ma Feagaiga 130:20-21. O le a se mea ua e aoaoina e uiga i le sootaga i le va o le tausia o poloaiga ma le mauaina o faamanuiaga a le Atua? Atonu e te manao e feaasinoai pe faafesootai fuaiupu nei i le Mosaea 2:41.
- Aisea e te manatu ai e faamanuiaina i tatou e le Tama Faalelagi i faamanuiaga faaletino ma faaleagaga? O le a se mea o aoao atu e lenei mea e uiga ia te Ia?

Gaoioiga E: “Afai latou te tutumau i le faamaoni e oo i le iuga, e talia i latou i le lagi, ina ia mafai ona latou mau faatasi ma le Atua i se tulaga o le fiafia e lē gata.”

Tusi le faamatalaga lenei i le ogatotonu o se itulau avanoa i lau api talaaga mo suesuega, ma tuu le avanoa faataamilo e tusi ai ni faamatalaga. Lio upu po o fasifuitau i le faamatalaga ia e taua ia te oe. Faapipii se lio e tusitusi ai i upu po o fasifuitau taitasi ua lio, ma tusi se faauigaga, fuaitau o mau e fesootai i ai, po o soo se isi lava malamalamaaga atonu o ia te oe.

Mo se faataitaiga, afai na e lioina le fasifuitau “talia i latou i le lagi,” o le lio tusitusi fesootai e ono aafia ai se mea e pei o le “O le taliaina o lo o ta’u mai ai o lo o i ai se tasi iina pe o lo o faatali mai ia oe. Na aoao mai Iesu o le a Ia saunia se nofoaga mo i tatou i le lagi ona talia lea o i tatou iina (tagai Ioane 14:2–3). O lo o i ai o’u matua faalelagi ma Iesu Keriso iina ma o le a talia a’u pe afai ou te tumau faamaoni.”

Faamae’a se lio tusitusi mo upu po o fasifuitau taitasi sa e lioina. Gauai atu i fesili po o uunaiga e oo mai i lou mafaufau.

- O a ni ou malamalamaaga na e maua a o faia lenei gaoioiga?
- E mafai faapefea e nei malamalamaaga ona fesoasoani ia oe i lou olaga i le taimi nei?

Gaoioiga I: “Ia manatua, ia manatua lava ua moni nei mea; ona ua fetalai mai ai le Alii le Atua.”

- O a nisi o mea e faigofie ona manatua? O a mea e sili ona faigata ona manatua?

Manatua mea ua e aoaoina e uiga i le Atua i lau suesuega o le Mosaea 2. Faitau le Mosaea 2:22, vaavaai mo upumoni faavavau e uiga i le Atua.

- O le a se mea ua e iloa e uiga i le Atua e mafai ona fesoasoani ia te oe e faalagolago ai i Ana folafolaga ma tausi Ana poloaiga?
- O le a se mea e mafai ona e faia e manatua ai lenei mea e uiga ia te Ia?